

二

曲

集

傳心錄序

人之所以爲人以其有是心也心之所以爲心以其  
虛靈不昧備四端而兼萬善也無人不具無時不然  
推之南海北海千百世之上千百世之下無弗同也  
聖之所以聖賢之所以賢愚之所以愚不肖之所以  
不肖統於是焉分之故不可以不學也學之如何亦  
惟全其心之所同不至於自昧其靈自趨於愚不肖  
之歸而已然而未易言也然必有傳而後學可得而  
言有學而後心可得而言昔人所謂有真師友然後

有真口訣是也楷生也鈍自舞象時蒙家嚴口授以  
曾大父聚岡公大父鳳台公家訓諄諄以治心爲務  
自是雖頗知所嚮而鞭策無人作輟乘之作再虛度  
祇是舊人辛亥春始獲受學於吾師二曲先生之門  
晨夕趨侍解惑啓蔽叨益良多而大要歸於治心楷  
聞之如飲瓊露不覺神思融暢噫使非彼蒼默佑得  
開心要則虛此生矣今師範日遠就正無從謹述其  
槩題曰傳心錄以見儀範雖遠而心範則存尊所聞  
行所知庶爲無負否則卽日侍兩丈亦何益哉吾轡

勗諸

皆

康熙辛亥清和朔晉陵門人陸士楷介侯氏拜題於

居敬堂

三曲集卷之六

傳心錄

晉陵門人陸士楷手錄

楷問心先生曰無心曰心果可以無乎曰行乎其所  
無事則無矣其未發也虛而靜其感而通也廓然  
大公物來順應如是則雖酬酢萬變而此中寂然  
瑩然未嘗與之俱馳非無心而何

又曰洪範皇極之敷言吾人空默存深體如無偏無  
陂蕩蕩平平等語可謂至言中懷如此便是心得

其平世運如此便是世得其平

又曰道理本是平常此心惟貴平常若厭平常而好高奇卽此便是勝心便是心不得其平善乎羅惟德之言曰聖人者常人而安心者也常人者聖人而不安心者也

問心體本然旣開命矣養之之功奈何先生曰終日乾乾收攝保任屏緣息慮一切放下令此心湛然若止水朗然如明鏡則幾矣

先生每言學須着裏敢問如何是裏先生曰裏也者

對外而言也爲學所以自盡其心自復其性非以炫彩矜名也須是刊落聲華潛體密詣纔有一毫露聰明逞修能之意便是表暴便是務外務外則心勞日拙縱使行誼超卓亦總是因人起見本實先撥天機絕矣烏足言學

然則着裏之學當如何下手先生曰別無他法各從自己病痛上着工夫務令病去則本體自全自古聖賢未嘗於本體外有所增益也如所病不除雖終日講究總是閒圖度終日祇修總是不貼切故

悔過自新乃爲學入門第一義於此若忽則其所  
不忽者可知矣

請問自新之功當從何處着力先生曰最上道理只  
在最下修能不必驚高遠說精微談道學論性命  
但就日用常行綱常倫理極淺極近處做起須整  
頓精神中常惺惺一言一動並須體察必使言無  
妄發行無妄動暗室屋漏一如大庭廣衆之中表  
裏精粗無一或苟明可以對人對天幽可以質鬼  
質神如是則潔淨透脫始可言功

敢問下學立心之始當以何者爲主先生曰用功莫先於主敬敬之一字徹上徹下的工夫千聖心傳總不外此須當下發憤拚一箇你死我活實實下一番苦工猶如人履危橋惟恐墮落不敢稍懈雖隱微幽獨無人指視而在我一念之知好知惡知是知非炯然於心目卽十目十手萬耳萬目之指示莫過於此豈可悠悠虛度姑息自恕

問爲己之學固得聞所未聞矣安身立命法可得聞乎先生曰李延平有云爲學不在多言默坐澄心

二曲集

卷六 傳心錄

五

○三百四十字

體認天理二語實爲用工之要務期莊敬靜默從容鎮定靜以培動之基動以驗靜之存刻刻照管步步提撕須臾少忽則非鄙滋而悔吝隨矣誠能屏緣息慮常寂常定口無他言目無他視耳無他聞心無他念內想不出外想不入潔潔淨淨灑灑脫脫此卽一念萬年之真面目也勿先講論以滋葛藤勿先著書以妨實詣勿執臆見於門面主爭閒氣去耳目支離之用以全虛圓不測之神則身安命立天賦之本然復矣

先生云爲學必先立志請問吾人立志當何如先生  
曰立志當做天地間第一項事當做天地間第一  
等人當爲前古後今着方擔當這一條大擔子自  
奮自力在一方思超出一方在天下思超出天下  
今學術久晦人失其心剛而明之不容少緩當與  
一二同心共肩斯事闡揚光大衍斯脉於天壤救  
得人心千古在勲名直與泰山高則位育參贊事  
業當不藉區區權勢而立矣

家嚴問如某等日暮途窮凡聰明才辨事業文章覺

與我本來真性皆無干涉稱此眼光未落時必如何策勵臨時方不散亂先生曰年登七旬便稱古稀矧幾八旬尤爲稀少縱生平著述絕世聰明過人聲名溢四海勲業超古今至此總與性命毫無干涉毫無可倚若不着意究心晝夜深體大事臨期悔恨何及爲今之計力將從前種種牽纏盡情擺脫如魚鳥之脫網羅麋鹿之離陷阱尋一安身立命歸原結果之處此望此中一念之炯炯者是也時時返照刻刻打點上不知有天下不知有地

前不知有人後不知有物性知有此而已一意凝  
此萬慮俱寂力到功深豁然頓契又須急急收攝  
愈沈愈寂以至於一念不起鬼神莫測中獨惺惺  
寸絲不掛如秋陽如江漢天機任運內外不着無  
聲無臭渾然太極盡此謂之盡性立此謂之立命  
感長者鍼芥之投骨肉至愛率爾狂談洩盡秘密  
可謂直吐心血惟願勸諸骨髓千萬努力無更因  
循稍涉依違大事去矣急急

二曲集卷之六終

識言

儒者之學明體適用之學也欲爲明體適用之學須  
讀明體適用之書未有不讀明體適用之書而可以  
明體適用者也珥生也鄙幼梏制舉長逐風塵於風  
雲月露之外茫不知學問爲何事戊申夏獲見蓋屋  
李先生始知學問之實始悔從前荏苒積習虛度半  
生自是痛自淬礪一惟先生之傳是體是遵茲先生  
東遊太華因便過珥竊喜如狂遂館先生於家塾晨  
夕參究因獲聞所未聞郡人士亦聞風爭造咸質所

疑先生隨資開發諄懇不倦其接人有數等中年以後惟教以返觀默識潛心性命中年以前則殷殷以明體適用爲言大約謂明體而不適用失之腐適用而不明體失之霸腐與霸非所以言學也珥因請明體適用當讀之宜先生遂慨然告語珥謹載筆而臚列之用以自勗並爲同臭味者勗昔

康熙八年己酉十月十四日午時也

二曲集卷之七

體用全學

二曲先生口授

左輔張珥手錄

明體類

象山集

先生在宋儒中橫發直指一洗諸儒之陋議論  
劉爽令人當下心豁目朗簡易直捷孟氏之後  
僅見今其書具有然學者第讀其年譜語錄及  
書答可也

二曲集

卷七 體用全學

陽明集

象山雖云單傳直指然於本體猶引而不發至  
先生始拈致良知三字以泄千載不傳之秘一  
言之下令人洞徹本面愚夫愚婦咸可循之以  
入道此萬世功也其書如年譜傳習錄尊經閣  
記博約說諸序及答人論學尺牘句句痛快字  
字感發當視如食飲裘葛規矩準繩可也

龍谿集

集凡二十卷皆發明良知之蘊宏暢精透闡發

無餘可謂前無往古後無來今後有作者不可  
尚矣然讀之亦須挈其要如往來寧國水西諸  
會語及書答每日當讀一過以豁心目若夫記  
序等作未免時有出入姑闕之

### 近溪集

近溪先生之學肫懇篤摯日精日進可謂大而  
化矣真近代第一了手人也其集發明經書要  
旨處娓娓千言捐去世儒蹊徑初學讀之驟難  
契入姑閱陶石簣所纂要語可也

慈湖集

慈湖楊敬仲之學直挈心宗大悟一十八遍小  
悟無數在宋儒中可謂傑出人多以近禪訾之  
先生之學豈真禪耶明眼人當自辨之

白沙集

白沙之學以自然爲宗去耳目支離之用全虛  
圓不測之神見之詞翰從容清直可以觀其養  
矣出辭氣遠鄙倍其先生之謂乎讀其集令人  
心融神怡如坐春風中氣質不以爲之默化

右數書明體中之明體也

二程全書

二程中興吾道其功不在禹下其書訂於朱子之手最爲精密此孔孟正派也

朱子語類大全

訂偏鰲弊折衷百氏巨細精粗無一或遺集諸儒之大成爲萬世之宗師讀其書味其學誠格物窮理之權衡也第卷凡百餘初學驟難徧覽先讀錄要然後漸及可也

朱子文集大全

溫醇典雅議論精密而奏議數十篇尤見天德  
王道之學

吳康齋集

康齋資本中庸用功刻苦其所著日錄專以戒  
怒懲忿消磨氣習爲言最切於學者日用

薛敬軒讀書錄

讀書錄效橫渠讀書之法隨得隨錄而成切近  
精純篤實輝光之學也無論知學者不忍釋手

卽絕不信學者覽之未有不肅然收歛鞭辟近裏者也

胡敬齋集

先生學重躬行以敬而入言論篤樸粹乎無瑕初學所當服膺也

羅整菴困知記

辨吾儒異端真似是非之分不遺餘力衛道之嚴足見良工苦心

呂涇野語錄

當嘉隆間天下言學者不歸王則歸湛其末流之弊高者言無知慧者言歸寂守程朱之說卓然不變者在南惟整菴在北惟先生而已先生生平不爲宏闊高遠之論其言布帛菽粟其文藹若穆若有德者之言風味自別共二十七卷馮恭定修之畢侍御表之學者不可不置之案頭此外如二程張朱抄釋亦時有精到之語要在覽者之善擇也

馮少墟集

先生與曹真子鄒南臯焦弱侯高景逸楊復所  
同時開堂會講領袖斯文然諸老醇厚者乏通  
慧穎悟者雜竺乾惟先生嚴毅中正一遵程朱  
家法集凡二十二卷如辨學錄發明儒佛之分  
疑思終割牘四書之蘊講學說做人說序記書  
牘咸足以堅學人之志定末流之趨凡人賤近  
而貴遠言及於先生未免東家丘視之可慨也  
右明體中之功夫也

自象山以至慈湖之書闡明心性和盤傾出熟讀

之則可以洞斯道之大源夫然後日閱程朱諸錄  
及康齋敬軒等集以盡下學之功收攝保任由工  
夫以合本體由現在以全源頭下學上達內外本  
末一以貫之始成實際

鄒東郭集

王心齋集

錢緒山集

薛中離集

耿天臺集

呂氏呻吟語

辛復元集

魏莊渠集

周海門集

以上諸集純駁相間含短取長以備參攷

適用類

大學衍義

真文忠公取經史要語勒成斯編誠吾人修己  
治人之著蔡治天下國家之律令格式也本之  
則治違之則亂然止於修身齊家而止其意以  
爲人君苟能修身齊家國與天下之治由斯而  
推之耳

衍義補

丘文莊公集古今經制之要而斷以己意其申  
治也詳其危亂也確事事足法言言可行精研

熟玩因時損益有志經國執此以往可也

文獻通考

江西馬貴與著元儒也當元時義不輕出折衷於古今朝典以成此書上至天官輿地以及禮樂兵農漕屯選舉曆數士卒典籍無不條晰

呂氏實政錄

寧陵呂新吾先生著此老卓識諳練經濟實學也在世儒中最爲適用實政錄皆其所經歷者學人無志於當世則已苟有志於用世則此書

必不可一日無

衡門芹

經世石畫

辛復元修中有確論可備採擇

經世挈要

屯田水利鹽政以及國計選將練兵車制火攻  
無不挈其要

武備志

凡八十冊古今戰陳機籌備萃此書視登壇必  
究加詳而孫子吳子暨紀効新書練兵事實尤

爲兵學之要

經世之法莫難於用兵。俄頃之間勝敗分焉。非可以涉嘗試也。今學者無志於當世。固無論矣。卽有志當世。往往於兵機多不致意。以爲兵非儒者所事。然則武侯之偉畧。陽明之武功。非耶。學者於此。苟能深討細究。而有得焉。則異日常機應變。作用必有可觀。

經世八編

凡二十套。惟馮應京實用編。鄧元錫函史下編。

可備參攷其餘勿覽

資治通鑑綱目大全

凡二十套乃格物之淵藪興亡治亂之成案也  
宜恒玩之論其世以熟吾之識

大明會典

明已亡矣典則在也雖時異世殊然朝政之所  
關故事之所詳學者安可不知

歷代名臣奏議

學人貴識時務奏議皆識一時之務者也當熟

玩之以爲奏記之助

右自衍義以至奏議等書皆適用之書也噫  
道不虛談學貴實效學而不足以開物成務  
康濟時艱真擁衾之婦女耳亦可羞已

律令

律令最爲知今之要而今之學者至有終其身  
未之聞者讀書萬卷不讀律致君堯舜終無術  
夫豈無謂而云然乎

農政全書 水利全書 泰西水法 地理險要

以上數種咸經濟所關宜一一潛心然讀書易  
變通難趙括能讀父書究竟何補實際神而明  
之存乎其人識時務者在子俊傑夫豈古板書  
生所能辨乎噫

二曲集卷之七終

識言

夫讀書之法前賢亦有目次矣然或博而不要或要而不醇何也書多而學人文人其所讀者殊也客歲戊申瓚受學於吾師二曲先生始略聞大本所在未遑言及讀書也已酉十月師復來遊太華往返兩經荒郡瓚肅奉起居間頗有緒聞然皆因瓚施教亦未遑言讀書也洎是月十五日辰時瓚率兒襄以侍蒙師垂慈慨然呼襄而命之曰小子可教也願瓚執筆口授讀書次第若干款出辭成經口占如流今瓚筆

筆不暇泚手不得輟傾刻間長翰數紙立滿瑣錄畢  
凝神覆省由小學漸入大學自經理徐及支史步步  
有正鵠書書有論斷真入聖之正門爲學之上路也  
踏破鐵鞋不遇去來人何處覓此門詢此路乎此等  
書程自童蒙以至大人皆不外此學人據此固無偏  
駁支離之弊文人據此亦自無風雲月露之習矣過  
此以往又有全體大用之目授張襄陵可並傳之以  
爲書程合璧

同州門人李士瓚文伯恭題

二曲集卷之八

讀書次第

二曲先生口授

同州門人李士璜手錄

小學

小學一書朱文公彙古今嘉言善行以爲後生  
作聖之基也易曰童蒙吉又曰蒙以養正聖功  
也蓋王道莫急於教人而養正莫先於童蒙使  
蒙時養之不得其正及其既長將責之以向上  
之事何可得乎故子弟須於小學熟讀力踐以

爲大成之基本然中間多引四書五經之語未免重複且多古禮及難字不便童習宜撮其要並童蒙須知同讀可也

### 近思錄

近思錄朱文公與呂成公類萃濂洛之精而成者也初學宜時閱之以爲格物致知之階

### 四書蒙引

晉江蔡虛齋著兢兢焉惟文公之訓是遵頗便初學此外如淺說存疑微言直解明白正大可

備參閱

四書疑思錄

凡四卷長安馮恭定公著

四書因問

高陵呂文簡公著

右二書爲德業而作非復制舉之故套也爽  
快明晰最爲做策學者宜致意焉

禮記大全

子云不學禮無以立則禮爲初學入德之門不

可以不先之者也中間雖多漢儒附會然曲禮檀弓學記表記坊記儒行樂記等篇多粹語至論宜日讀一過以薰心元儒吳草廬纂要一書熟讀成誦尤佳

禮記疏

視集註頗詳治禮者不可無然多汗漫瑣冗節讀之可也

周禮註疏

周禮一書乃周公經國之遠猷萬世制治之良

規也王莽假之而篡漢荆公膠之而禍宋後人  
遂以周禮爲諱豈真知周禮者哉近代柯尚遷  
舒國裳咸諄諄發明魏莊渠尤三致意焉其註  
皆可觀也

儀禮註疏

儀禮十七篇最切於日用乃禮中之經也雖時  
異世殊難以盡遵然斟酌損益隨時變化可也  
儀禮經傳通解

士生於三代之後欲見三代以前禮儀賴有儀

禮一書而禮記乃其傳也後人以禮記列於學  
官而儀禮遂置之不講古禮之不盡復也有由  
矣宋慶元間朱文公先生嘗欲表儀禮爲經禮  
記爲傳累疏請於朝開局編纂會學禁大作不  
果門人黃勉齋成其志而附以秦漢以來史典  
之有及於禮者於其下名曰儀禮經傳通解去  
取精嚴所宜深究

文公家禮儀節

丘壘山增損文公原書而成者也詳明可閱

西禮翼

呂新吾著最切日用

詩經大全

詩雖可興然古人之治詩如今人之習曲被之  
管絃發之聲音有高下抑揚清濁疾徐之節令  
人聽之心爽神怡颯颯乎有人不自覺其變也  
今人則執冊板誦卽老師宿儒亦漠焉無動矧  
初學乎今雖不能盡如古法亦須從容玩味抑  
揚頓挫庶涵育薰陶養成德性

詩經註疏

醇駁相間要在讀者之善擇

書經大全

惜無折衷亦在讀者之善擇

春秋大全

無折衷

春秋左氏傳

左氏一書春秋之全案也治春秋而不先讀左氏猶斷獄訟而不用兩造未有能得其情者也

先讀句解後讀杜註

春秋穀梁傳

穀梁赤著

春秋公羊傳

公羊高著

右二傳皆爲解經而作經學之入門也然多

穿鑿公羊解尤甚

春秋胡氏傳

朱紹興間胡文定公著明暢剴切議論英發誠

三曲集

卷八

五

經學之粹者也過於諸家遠矣然中間亦多有  
爲而發讀者不可不知也

春秋啖氏傳

四傳而外惟此乃得肯綮此外如陸氏趙氏亦  
多可取

周易大全

惜無折衷

周易古今文全書

文雖浩汗然須閱之以盡古今之變

周易程氏傳

程傳義理淵深辭旨高古誠易學之楷模也

易經本義

朱文公先生著謂易本爲卜筮而作故是解遵  
程而輔以卜筮之義

謹按漢晉以還說易者無慮數十百家獨荀爽鄭  
元何宴王弼王肅等九家爲最著然皆舉一廢百  
各執一察以自好宋儒則程伊川主理而時失之  
鑿楊誠齋優程而中多牽合近代惟鄧徵君元錫

易繹宏暢精深發昔人所未發此外如孫淮海易  
譚辛天齋易象歸元亦各有透髓之見要之亦未  
免束於教而易象則幾微矣若夫剖象外之蘊蘄  
卦畫之隱還當以來註備參考來本蜀人西蜀自  
楊子雲薛翁以來世傳象數之學來生於其鄉當  
隆萬間絕意軒冕人求溪萬山中研精殫思幾三  
十年而後有悟於錯綜之旨勒爲一註共十六卷  
其序文高自標訓學者驟覽之未免河漢其言然  
去短集長是在讀者之自酌雖然造化混沌而後

開闢晦塞而後文明是故歸藏於坤乃聖學第一  
義噫斯其爲天根乎吾人須是洗心藏密深造默  
成其於易也始庶幾乎

五經繹

鄧潛谷著思深識正粹然自成一家

九經解

郝京山著闢古今拘曲之見妙發心得過於諸  
家遠矣

資治通鑑胡氏註

經旣治可以觀史矣觀史須先觀編年而編年  
莫詳於司馬氏通鑑上下數千年治亂興亡之  
迹爛若指掌又得天台胡三省爲之註有評有  
駁誠編年之折衷也

宋元通鑑

武進薛方山著於宋元事迹最詳此外如李燾  
長編紀事本末等書不閱可也

皇明憲章錄

先是廣東陳建有皇明通紀一書久已行世

蕪穢不倫識者病之薛方山於是撰憲章錄大  
書特書粹然一歸於正始自明祖終於正德十  
六年若夫正德以後則有沈氏嘉隆聞見記此  
二書於明事頗挈其要他若吾學編皇明大政  
記續藏書勿覽

函史上編

凡四十冊鄧元錫著約二十一史而成之者也  
學者讀編年之後固宜讀史以盡其詳然歷代  
正史簡帙浩繁難以徧覽惟此編提綱挈微誠

史學之要刪也宜留意焉

函史下編

上自天官曆法下自賦役漕屯援古證今靡不  
折衷經世者之所不能外也

八大家文鈔

史旣通可以肄文矣文自先秦兩漢之外莫雄  
於韓昌黎柳柳州歐陽子三蘇王荊公曾南豐  
然八家全集未能徧讀惟文鈔乃歸安茅鹿門  
選去取甚精宜熟讀之以暢其筆

皇明十大家文選

明人李北地首以古文辭爲多士倡繼其後者  
如李滄溟王元美汪道昆董潯陽王陽明王慎  
中茅坤王維禎唐荆川等咸錦心繡口旗鼓中  
原然惟北地之文雄渾古勁陽明之文明暢爽  
豁荆川之文清明俊潔便於誦誦似不可不知  
也

右經史文乃學人之急務有餘力則老莊管  
韓檀子鴻烈等集或間一披覽以廣其識可

也地理書惟大明一統誌寰宇通記於郡邑  
形勢戶口錢糧臚列周詳宜購之以備參閱  
又有廣輿記皇輿圖職方考鏡然終不若一  
統誌之詳甚勿觀覽以分精力

康熙八年十月十五日辰時錄

二曲集卷之八終

二曲集卷之九

東行述

門人趙之俊述

丁未春先生錢邑侯駱公赴京師始東行登華嶽  
先生性不喜遊足未嘗踰邑境是時因錢駱侯東  
行始爲華麓之陟駱侯者浙人涇邑有異政尊賢  
敬士詳見河汾賈發之養賢記中故先生遠送之  
先是蒲城有高士省庵王翁者耄而篤志數就先  
生質所學至是復詣盤屋盤桓者二旬歸而偕黨

二曲集

卷九

三百九十六字

兩一王思若白含章奉候先生於同蒲黨爲少墟  
先生及門年踰八旬樂善不倦王高尚其志坦夷  
樸澹有陶靖節之風白博洽群籍爲月旦所崇重  
咸稱先生心契於是過黨齋王園及白氏軒白貯  
書數屋先生覽而樂之拙所未見借之以西

戊申夏四月含章省庵肅禮幣留黨生惟學奉迓  
十九日惟學至罄屋拜呈書贊

二十四日先生徘徊妣墓泝奠告行

二十五日別姊乃發晚宿興平之定村明日迂道詣

茂陵遂次畢郢

詣茂陵謁漢武帝也又東五十里至畢郢謁周文  
武成康四陵及太公周公二塚

二十七日次涇干之瓦村會逸士王爾德

逸士介繁有守數詣盤屋先生念其年逼桑榆恐  
難再覲故往會之逸士喜甚請曰敝邑士人斗仰  
先生久矣曩有託先生姓字寓茲古剎行誑者敝  
邑至今以爲談柄願先生少留以慰衆望先生以  
旅次疲劇辭焉逸士追隨遠送至高陵之北境而

別

二十八日至下邳謁寇萊公祠弔其遺址

二十九日至蒲城謁橫渠張子祠時有邑紳索雲老  
王伯仁等諸公刺見啓延先生例不報謁辭之

五月初二日抵車都省庵預治靜室以俟先生館焉  
晉謁者無虛日室隘不能容乃假他氏空舍之宏  
敞者棲之先生爲之發明固有之良喚醒人心大  
約謂此良昭昭於心目之間蔽之不能昧擾之不  
能亂滅之無所損增之無所益與天地合德而日

月同明通乎晝夜之道而知順而行之便是天則  
不必支離葛藤義襲於外舍真求假空自擗閣  
又曰此固有之良本自炯炯本是廣大妄念一起  
卽成昏隘然光明廣大之實未嘗不存要在時覺  
時惕致慎幾微

一友謂連日深荷先生之誨頗知打點身心自尋  
歸結先生曰言尋歸結是微所志但恐立本不固  
世俗富貴利達之念乘間發生不知不覺漸爲轉  
移日復一日大負初心須是勇猛省克拔去病根

俾心若死灰不致緣境出入方有實際昔姑蘇有  
盛寅者人以椒寄其家十五年矣一旦夢有客急  
欲用椒啓其封取少許覺而痛自咎責豈吾義利  
有不明耶何以有此夢亟整衣冠而坐數日猶不  
釋然噫人能若此用功何患無歸結也

是時在侍諸友有自多其知者則勉之以忘知有  
自雄其抱者則詔之以放下一友談鋒甚暢論辯  
泉湧先生撫然歎曰然而存之希顏之愚爲魯之  
魯到睿訥不能出口時纔是有進若神馳於舌恐

非所謂塞兌之學也其友慚謝先生在軍都不惟  
士友因感生奮多所興起卽農商工賈亦環視竊  
聽精神躍勃有農民李正父祖三世從事白蓮教  
正遵其教戒葷酒虔焚修者已歷數十載先是奉  
旨厲禁異端里鄰恐禍連保伍相與力勸力改正惟  
刑戮是甘終不少變至是有感卽日對衆焚毀經  
像飲酒開葷幡然歸正闔里醪酒相慶傳爲美談  
同蒲士大夫多爲詩歌以嘉之

十七日先生赴同之戶軍里館於白君書屋是日也

車都士民擁車瞻送李正等追隨至同之白君書  
屋再拜垂泣而別先生在白君書屋焚香默坐晤  
對簡編閉扇謝客客弗止也白君乃延客別館晨  
起入揖相與一會會時不遽與之談必坐久氣定心  
澄方從容商量所疑意懇旨暢詞平氣和士之承  
警咳者各強強有當於心者僑馬翁逢年輩或年  
踰古稀或壽筭八旬咸甘心北面焉

六月初九日先生遊州城東關之廣成觀郡紳張襄

陵諱耳李淮安諱子燮等執刺來會

張李俱世家蓄書甚富延先生臨觀先生例不履  
顯達之門辭之城東有廣成觀幽邃甲一郡張邀  
先生避暑於中於是士紳聞風爭造雖少長叢雜  
而規模靜定天時酷熱渾若涼爽

會間或謂聖人本是生知衆人止是學知稟來便  
不同先生言衆人俱是生知聖人方是學知稟來  
箇箇同咸訝其言先生曰孩而知愛長而知敬見  
赤子之入井而知惕一切知是知非知好知惡之  
之真知日在人心敢問此知衆人與聖人同耶否

耶咸曰同曰敢問此知學之而然耶抑不學而然  
耶曰此原不待學而然曰然則此非生知而何非  
稟來箇箇之皆同乎聖人肯學所以兢業保任能  
全此知是以謂之聖衆人不肯學所以隨起隨滅  
自負其知是以謂之凡是聖凡之分在學與不學  
之分非知之有分稟來之原不同也

或又言聖賢之道不外孝弟事親從兄莫非實學  
舍此無學可言曰能孝能弟固是實學然此能孝  
能弟之端從何而發滿孝滿弟之量賴何而克侍

父兄而可以言事言從有時離父兄之側則將何  
若有父兄而善事善從是學無父無兄又將何若  
或無以對先生曰聖賢之道雖不外於孝弟而知  
孝知弟則必有其源源濬則千流萬派時出無窮萬  
善猶裕知孝弟乎故不待勉於孝遇父自能孝不  
待勉於弟遇兄自能弟存則或事或從自然盡道  
亡則立身行道大孝顯親隨在是心隨在是學等  
閒識得東風面萬紫千紅總是春非春則安得萬  
紫千紅非識東風面又安知萬紫千紅之總是春

也

是夕乘涼坤成閣樹烏時鳴清風徐來相與默坐  
久之先生因詢曰此際俱各神閒氣定冲融和平  
不審各人胸中自覺何若襄陵云此際殊覺輕活  
暢適生意勃發清明洞達了無一物先生莞然首  
肯曰惟願無忘此際心

一時之清明無物便是一時之仁體呈露趣此一  
時之清明延之時時皆然積時成日積日成月積  
月成年絲絲密密渾然罔間徹始徹終表裏湛瑩

如是則形骸肢體雖與人同而所以視聽言動  
是天機可以達天可以補天矣珍重珍重毋自辜  
負

十六日赴朝邑謁韓恭簡公祠明日觀於河遂歸廣  
成觀

同州距朝邑僅舍恭簡公祠在焉故先生特往拜  
謁至次日邑南諸同志及學博劉先生咸來見且  
東請俱辭遂臨河觀渡而歸

十八日觀蓮於九龍池晚抵沙苑

九龍池在東城南十里蓮花盛開李淮安固邀先生臨觀是日環池人士先期集候叩學質疑先生隨資開發脫去見聞聽之者骨悚神豁喜溢顏面薄暮將別咸慙惠李公挽留而沙苑馬立若馬仲任等力請之西臨是晚遂抵沙苑

至白君居有三路一由七里村一由銅堤一由沙苑先是沙苑人日望先生之至馬仲任等令人偵候筮之其兆爲大過咸喜曰大過大者過也大人必過無疑至是馬族生傳二十餘人接見羅坐榻

傍剪燭請教夜分就寢

十九日謁馬二岑先生祠閣遺集

二岑先生爲大學士文莊公之從孫兵憲之冢嗣  
明末建書院開講倡學慨然以師道自任後宦山  
東死於國難大忠大節人共追慕先生拜其遺像  
從先生長子馮穢土索其遺集覽焉

穢土致審於經書同異之辨先生爲之逐段析疑  
旣而問六經大旨先生默然示之以寂穢土頓醒  
拜謝或詰其故穢土曰無聲無臭六經之所以出

亦六經之所以歸也在座諸君咸請開示先生爲之並指大本令各反身潛體洞識真我諸拘方守轍炫文飾義者莫不如寐獲覺盤桓數日而西域土卽席賦詩三章以誌感

其一

天地無終極大道日綦莽鄒魯不復作千古懷今想嗟吾關中士絕學嗣邁往橫渠啓趙宋高陵復振響長安少墟翁芳躅爲世仰誰能嗣徽音復使斯道晃夫子特地起天授非人強與徹危微機探穴千聖期

從茲盤屋功直駕姚江爽

其二

人爲萬物靈靈者詎形骸大立小不奪此語良不乖  
天清夜月明纖翳何容排所以陽明子良知探聖涯  
此理固非誣何事獨塵埋上下千載間師也豁其靈  
願言誨無倦先覺廸吾儕

其三

十年勞夢想神交仰山斗投契斯須間此遇良非偶  
所恨多間濶親炙苦未久白駒不少停空谷頓成秀

何以慰吾情相對一杯酒後會諒無遐跡踟躕徒搔首  
二十七日歸於白君書屋立若仲任穢土等隨侍

明日李習之王思若張襄陵王盛伯等至爾時從  
客商議朝夕不輟先生丘隴興思歸心頗亟衆弗  
能留肅觴奉餞李孝廉李淮安等聞之傍晚馳二  
十里渡淮來送

七月初六日先生別歸

別之時諸老依依相戀有泣下者王省庵寧惟垣  
等遠送其僕王昭泣不自勝遂偕白僕執御以西

初八日至高陵謁呂涇野先生祠次於涇干之文塔寺

塔在涇野先生祠之西二十五里爲關中第一勝槩故過而陟眺適高陵于翁憩息大雄殿遙見先生卽具衣冠趨迎曰此必蓋屋李先生也不才方擬入冬造訪不意邂逅於此此中大有機緣殆天作之合也亟繫館安置披瀝衷懷

初九日兩邑名流聞之者咸來拜謁盤桓塔下禪師琳峩亦環視傾聽歎未曾有一士酷好內典細質

所疑先生一一響答凡楞嚴圓覺心經壇經涅槃  
止觀廣錄宗鏡錄大慧中峯諸語錄要旨及三藏  
中真似是非之辨咸爲拈出旣而喟然嘆曰吾儒  
之道至簡至易至平至實反而求之自有所得故  
不必借津竺乾索之無何有之鄉空虛莽蕩究無  
當於天下國家也遂作別衆苦留爲之再宿而行  
十一日下午抵咸陽北郭學博湯君諱日廣聞先生  
過大喜亟延以館餼苦留不可

十二日至興平審雜垣別去

是行也先生偶患痢維垣追隨調侍至是別焉  
先生既歸語俊以諸君高誼俊於是述厥始末如左  
蓋先生素未遠行茲其發軔故謹誌之吾輩其尚  
堅乃志一乃心服膺所聞不以合離生作輟庶無  
負先生跋涉之意云

康熙七年秋仲朔日述

念二曲先生書牖

吾見先生其人矣。式金式玉。吾聞先生之語矣。切性  
切身。果然。朱李之儔。展矣。周程之侶。豈因博雅。徒步  
西征。爲述典刑。甘心北面。恨三偏之爲害。常憶格言。  
愧四勿之未能。每思德範而今而後。舍舊從新。雖云  
年老力衰。何憚朝聞夕死。立名胡必於文藝。崇德惟  
在於躬修。苟寶行之無稱。奚餘能之足羨。端有兩大  
日行。與言出聲。則循理而談。舉趾則擇方而蹈。一言  
之舛。尚憂見惜於先生。一事之違。豈可使聞於夫子。

但恐一朝而奮時久而遷若非豎誠以當前何以淑  
身於去後以故書茲揭牖用代嚴師坐起常觀庶幾  
身無妄動朝昏時誦庶可口無妄言嗚呼千載篤生  
學公匪易若欲遽臻乎賢哲其將能乎一言旣出反  
汗實難雖欲自處於不才不可得也爰公同志共勵  
克終時康熙戊申孟秋之十九日也

二曲先生蓋厓人諱頤其人則矩方規圓因物而付  
其學則天通地徹隨扣而鳴窮則可以善身達則可  
以淑世斯文之寄其在斯乎不肖年久耳香名每以

修阻不得從遊爲恨幸白含章社丈於今歲五月間  
安車迎至道遂以東豈含章閱近世學之不講又憐  
人之不能盡涉長途就有道欲以先生公之吾儕使  
府左之人共沾化雨乎甚盛舉也可以鼓舞人心矣  
故一時有志之士多就之者僕不自揣亦徒步拜訪  
適先生素昔與談性命之學者蒲城王省齋兄又迎  
之去意者省齋復問其鄉之老而癯如年者並以近  
涉五六十里爲苦故欲使其藉便見先生同登覺路  
亦如含章之公先生於府左意乎於戲省齋含章俱

可以爲難矣是時余以未見先生怒如調餞無何先生自蒲返年復訪諸党孝子兩一兄之齋亦先生之故人也坐談竟日至是始了夙心仍復候之王思若會丈園中以思若前有字來達不肖於園中相會蓋先生與思若彼此以品德相欽重爲數百里神交寸書相往復者有年余之知先生也實以思若故雖見諸兩一於此復趣其命且不負思若成就不才之雅意也凡三謁矣自此之後幾於自廢遂憊然思更舊轍至六月終先生又以拜恭簡公墓藉晤余妹丈李

河濱復有朝邑之行道經吾州縉紳諸公暨通國序  
友之前未識先生者咸於茲以聯藉輝光張襄陵李  
文伯尤稱慕道最篤及旋前茲之相從者族尊立若  
族弟仲任復藉先生遊蓮池之便邀至荒鄉鄉之士  
諸先生者十之八九衰宗則少長不遺一人共擬接  
轄爲十日之留時先生適感風邪欲歸謁藥餌信宿  
卽返舍章之舍矣余坐以不知先生之風駕宴起未  
及一送爲悵也去後前言書牖

門人馬逢年書時年七十三